

醫
種
子

仲景脈法
叔和序例

漢書門類			
一	二	三	四
冊	架	函	號

內閣文庫		
三	二	一
函	架	冊

內閣文庫	
番號	漢 12988
冊數	14 (3)
函號	301 18



刻仲景傷寒論緣起

仲景作卒病論為醫方之祖王叔和復撰次之成無
已又疏註之易名傷寒論其原本不可得見矣素問
以傷寒為熱病其六經之證與本論不同叔和雖引
經序列于端却未有以通兩者之義千載而下真令
人疑嘗從長明聞演因明論偶觸內經標本之旨蓋
仲景深入陰陽大論而標本是陰陽之樞要也乃用
因明入正理論法立量曰傷寒是有法則為病熱是
宗因曰寒勝熱故同品如風濕等異品如內傷等同
喻如水尅火異喻如恐勝喜如此審定傷寒一端則

可與中風中濕之同品者互相辨論互相評論此仲
景立法之大義也不識何以與數百世之下千百國
之外之商羯羅主菩薩論法脗合如此若立傷寒有
法則以寒水爲本氣寒氣之中分出六經斯之謂標
若寒水本氣自病則有勝復別爲病傳矣本氣旣分
其標斯有定位旣有定位標中亦自有其氣與本氣
互爲病形如本論之大青龍湯一症內經所謂病友
其本得標之病治反其本得標之方其義以中風爲
本太陽爲標標之寒氣反顯而本之風氣似隱所謂
得標病也故治從標用桂枝湯以治本之風重麻黃
石膏以從標之寒所謂得標方也可例而思之且人
一身上半法天以應乎天氣下半法地以應乎地形
設如太陽一經從頭走足上下自有分位如太陽之
上病則應天之寒氣太陽之下病則應太陽經脉仲
景專主標本歷陳氣變是以證指氣化而畧言經病
內經篇有宗因唯指定向是以證云經脉而暗合標
本斯義也合經與論之旨千載未經道破不敢自決
請正大方敬刻論本爲前茅
萬曆己未穀雨錢塘後學不遠盧復自記

傷寒卒病論序

漢長沙守南陽仲景張機著

余每覽越人入虢之診望齊侯之色未嘗不慨然歎其才秀也怪當今居世之士曾不留神醫藥精究方術上以療君親之疾下以救貧賤之厄中以保身長全以養其生但競逐榮勢企踵權豪孜孜汲汲惟名利是務崇飾其末忽棄其本華其外而悴其內皮之不存毛將安附焉卒然遭邪風之氣嬰非常之疾患及禍至而方震慄降志屈節欽望巫祝告窮歸天束手受敗賫百年之壽命持至貴之重器委付凡醫恣

其所措咄嗟嗚呼厥身以斃神明消滅變爲異物幽
潛重泉徒爲啼泣痛夫舉世昏迷莫能覺悟不惜其
命若是輕生彼何榮勢之云哉而進不能愛人知人
退不能愛身知己遇災值禍身居厄地蒙蒙昧昧蠢
若遊魂哀乎趨世之士馳競浮華不固根本忘軀徇
物危若冰谷至于是也余宗族素多向餘二百建安
紀年以來猶未十稔其死亡者三分有二傷寒十居
其七感往昔之淪喪傷橫天之莫救乃勤求古訓博
采衆方撰用素問九卷八十一難陰陽大論胎臚藥
錄并平脉辨證爲傷寒雜病論合十六卷雖未能盡

愈諸病庶可以見病知源若能尋余所集思過半矣
夫天布五行以運萬類人稟五常以有五藏經絡府
俞陰陽會通玄冥幽微變化難極自非才高識妙豈
能探其理致哉上古有神農黃帝岐伯伯高雷公少
俞少師仲文中世有長桑扁鵲漢有公乘陽慶及倉
公下此以往未之聞也觀今之醫不念思求經旨以
演其所知各承家技終始順舊省疾問病務在口給
相對斯須便處湯藥按寸不及尺握手不及足人迎
跌陽三部不參動數發息不滿五十短期未知決診
九候曾無髣髴明堂闕庭盡不見察所謂窺管而已

夫欲視死別生實爲難矣孔子云生而知之者上學則亞之多聞博識知之次也余宿尚方術請事斯語

仲景脉法

漢 張仲景述

明後學錢塘盧復正

晉 王叔和撰次

男之頤校

辨脉法第一

平脉法第二

辨脉法第一

問曰脉有陰陽何謂也答曰凡脉大浮數動滑此名陽也脉沉濇弱弦微此名陰也凡陰病見陽脉者生陽病見陰脉者死

問曰脉有陽結陰結者何以別之答曰其脉浮而數能食不大便者此爲實名曰陽結也期十七日當劇

其脉沉而遲不能食身體重大便反鞭名曰陰結也
期十四日當劇

問曰病有洒淅惡寒而復發熱者何答曰陰脉不足
陽往從之陽脉不足陰往乘之曰何謂陽不足答曰
假令寸口脉微名曰陽不足陰氣上入陽中則洒淅
惡寒也曰何謂陰不足答曰尺脉弱名曰陰不足陽
氣下陷入陰中則發熱也陽脉浮陰脉弱者則血虛
血虛則筋急也其脉沉者榮氣微也其脉浮而汗出
如流珠者衛氣衰也榮氣微者加燒針則血留不行
更發熱而躁煩也

脉藹藹如車蓋者名曰陽結也

脉累累如循長竿者名曰陰結也

脉瞥瞥如羹上肥者陽氣微也

脉縈縈如蜘蛛絲者陽氣衰也

脉綿綿如瀉漆之絕者亡其血也

脉來緩時一止復來者名曰結脉來數時一止復來

者名曰促脉陽盛則促陰盛則結此皆病脉

陰陽相搏名曰動陽動則汗出陰動則發熱形冷惡

寒者此三焦傷也若數脉見於關上上下下無頭尾如

豆大厥厥動搖者名曰動也

陽脉浮大而濡陰脉浮大而濡陰脉與陽脉同等者名曰緩也

脉浮而緊者名曰弦也弦者狀如弓弦按之不移也脉緊者如轉索無常也

脉弦而大弦則爲減大則爲芤減則爲寒芤則爲虛寒虛相搏此名爲革婦人則半產漏下男子則亡血失精

問曰病有戰而汗出因得解者何也答曰脉浮而緊按之反芤此爲本虛故當戰而汗出也其人本虛是以發戰以脉浮故當汗出而解也若脉浮而數按之不芤此人本不虛若欲自解但汗出耳不發戰也

問曰病有不戰而汗出解者何也答曰脉大而浮數故知不戰汗出而解也

問曰病有不戰不汗出而解者何也答曰其脉自微此以曾經發汗若吐若下若亡血以內無津液此陰陽自和必自愈故不戰不汗出而解也

問曰傷寒三日脉浮數而微病人身涼和者何也答曰此爲欲解也解以夜半脉浮而解者濺然汗出也脉數而解者必能食也脉微而解者必大汗出也

問曰脉病欲知愈未愈者何以別之答曰寸口關上

尺中三處大小浮沉遲數同等雖有寒熱不解者此
脈陰陽爲和平雖劇當愈

師曰立夏得洪大脈是其本位其人病身體苦疼重
者須發其汗若明日身不疼不重者不須發汗若汗
濺濺自出者明日便解矣何以言之立夏得洪大脈
是其時脈故使然也四時倣此

問曰凡病欲知何時得何時愈答曰假令夜半得病
者明日日中愈日中得病者夜半愈何以言之日中
得病夜半愈者以陽得陰則解也夜半得病明日日
中愈者以陰得陽則解也

寸口脈浮爲在表沉爲在裏數爲在府遲爲在藏假
令脈遲此爲在藏也

趺陽脈浮而濇少陰脈如經者其病在脾法當下利
何以知之若脈浮大者氣實血虛也今趺陽脈浮而
濇故知脾氣不足胃氣虛也以少陰脈弦而浮纔見
此爲調脈故稱如經也若反滑而數者故知當屎膿
也

寸口脈浮而緊浮則爲風緊則爲寒風則傷衛寒則
傷榮榮衛俱病骨節煩疼當發其汗也

趺陽脈遲而緩胃氣如經也趺陽脈浮而數浮則傷

胃數則動脾此非本病醫特下之所爲也榮衛內陷其數先微脉反但浮其人必大便鞭氣噫而除何以言之本以數脉動脾其數先微故知脾氣不治大便鞭氣噫而除今脉反浮其數改微邪氣獨留心中則飢邪熱不殺穀潮熱發渴數脉當遲緩脉因前後度數如法病者則飢數脉不時則生惡瘡也

師曰病人脉微而濇者此爲醫所病也大發其汗又數大下之其人亡血病當惡寒後乃發熱無休止時夏月盛熱欲着複衣冬月盛寒欲裸其身所以然者陽微則惡寒陰弱則發熱此醫發其汗使陽氣微又

大下之令陰氣弱五月之時陽氣在表胃中虛冷以陽氣內微不能勝冷故欲着複衣十一月之時陽氣在裏胃中煩熱以陰氣內弱不能勝熱故欲裸其身又陰脉遲濇故知亡血也

脉浮而大心下反鞭有熱屬藏者攻之不令發汗屬府者不令溲數溲數則大便鞭汗多則熱愈汗少則便難脉遲尚未可攻

脉浮而洪身汗如油喘而不休水漿不下形體不仁乍靜乍亂此爲命絕也又未知何藏先受其災若汗出髮潤喘而不休者此爲肺先絕也陽反獨留形體

如烟熏直視搖頭者此爲心絕也唇吻反青四肢縴
習者此爲肝絕也環口黧黑柔汗發黃者此爲脾絕
也溲便遺失狂言目反直視者此爲腎絕也又未知
何藏陰陽先絕若陽氣前絕陰氣後竭者其人死身
色必青陰氣前絕陽氣後竭者其人死身色必赤腋
下溫心下熱也

寸口脈浮大而醫反下之此爲大逆浮則無血大則
爲寒寒氣相搏則爲腸鳴醫乃不知而反飲冷水令
汗大出水得寒氣冷必相搏其人卽餒

跌陽脈浮浮則爲虛浮虛相搏故令氣餒言胃氣虛
竭也脈滑則爲噦此爲醫咎責虛取實守空迫血脈
浮鼻中燥者必衄也

諸脈浮數當發熱而洒淅惡寒若有痛處飲食如常
者畜積有膿也

脈浮而遲面熱赤而戰惕者六七日當汗出而解反
發熱者差遲遲爲無陽不能作汗其身必痒也

寸口脈陰陽俱緊者法當清邪中於上焦濁邪中於
下焦清邪中上名曰潔也濁邪中下名曰渾也陰中
於邪必內慄也表氣微虛裏氣不守故使邪中於陰
也陽中於邪必發熱頭痛項強頸攣腰痛脛酸所謂

陽中霧露之氣故曰清邪中上濁邪中下陰氣爲慄足膝逆冷便溺妄出表氣微虛裏氣微急三焦相溷內外不通上焦怫鬱藏氣相熏口爛食斷也中焦不治胃氣上衝脾氣不轉胃中爲濁榮衛不通血凝不流若衛氣前通者小便赤黃與熱相搏因熱作使遊於經絡出入藏府熱氣所過則爲癰膿若陰氣前通者陽氣厥微陰無所使客氣內入噫而出之聲嗝咽塞寒厥相逐爲熱所壅血凝自下狀如豚肝陰陽俱厥脾氣孤弱五液注下下焦不闔清便下重令便數難臍築湫痛命將難全

脉陰陽俱緊者口中氣出脣口乾燥踈臥足冷鼻中涕出舌上胎滑勿妄治也到七日以來其人微發熱手足溫者此爲欲解或到八日以上反大發熱者此爲難治設使惡寒者必欲嘔也腹內痛者必欲利也脉陰陽俱緊至於吐利其脉獨不解緊去入安此爲欲解若脉遲至六七日不欲食此爲晚發水停故也爲未解食自可者爲欲解病六七日手足三部脉皆至大煩而口噤不能言其人躁擾者必欲解也若脉和其人大煩目重臉內際黃者此欲解也脉浮而數浮爲風數爲虛風爲熱虛爲寒風虛相搏

則洒淅惡寒也

脉浮而滑浮爲陽滑爲實陽實相搏其脉數疾衛氣失度浮滑之脉數疾發熱汗出者此爲不治傷寒欬逆上氣其脉散者死謂其形損故也

平脉法第二

六八

問曰脉有三部陰陽相乘榮衛血氣在人體躬呼吸出入上下於中因息遊布津液流通隨時動作效象形容春弦秋浮冬沉夏洪察色觀脉大小不同一時之間變無經常尺寸參差或短或長上下乖錯或存或亡病輒改易進退低昂心迷意惑動失紀綱願爲

具陳令得分明師曰子之所問道之根源脉有三部尺寸及關榮衛流行不失衡銓腎沈心洪肺浮肝弦此自經常不失銖分出入升降漏刻周旋水下百刻一周循環當復寸口虛實見焉變化相乘陰陽相干風則浮虛寒則牢堅沉潜水畜支飲急弦動則爲痛數則熱煩設有不應知變所緣三部不同病各異端太過可怪不及亦然邪不空見中必有奸審察表裏三焦別焉知其所舍消息診看料度府藏獨見若神爲子條記傳與賢人

師曰呼吸者脉之頭也初持脉來疾去遲此出疾入

遲名曰內虛外實也初持脈來遲去疾此出遲入疾名曰內實外虛也

問曰上工望而知之中工問而知之下工脈而知之願聞其說師曰病家人請云病人苦發熱身體疼痛病人自臥師到診其脈沉而遲者知其差也何以知之若表有病者脈當浮大今脈反沉遲故知愈也假令病人云腹內卒痛病人自坐師到脈之浮而大者知其差也何以知之若裏有病者脈當沉而細今脈浮大故知愈也

師曰病家人來請云病人發熱煩極明日師到病人向壁臥此熱已去也設令脈不和處言已愈設令向壁臥聞師到不驚起而眈視若三言三止脈之嚙唾者此詐病也設令脈自和處言汝病大重當須服吐下藥針灸數十百處

師持脈病人欠者無病也脈之呻者病也言遲者風也搖頭言者裏痛也行遲者表強也坐而伏者短氣也坐而下一脚者腰痛也裏實護腹如懷卵物者心痛也

師曰伏氣之病以意候之今月之內欲有伏氣假令舊有伏氣當須脈之若脈微弱者當喉中痛似傷非

喉痺也病人云實咽中痛雖爾今復欲下利
問曰人恐怖者其脉何狀師曰脉形如循絲累累然
其面白脫色也

問曰人不飲其脉何類師曰脉自濇唇口乾燥也

問曰人愧者其脉何類師曰脉浮而面色乍白乍赤
問曰經說脉有三菽六菽重者何謂也師曰脉人以
指按之如三菽之重者肺氣也如六菽之重者心氣
也如九菽之重者脾氣也如十二菽之重者肝氣也
按之至骨者腎氣也假令下利寸口闕上尺中悉不
見脉然尺中時一小見脉再舉頭者腎氣也若見損

脉來至爲難治

問曰脉有相乘有縱有橫有逆有順何謂也師曰水
行乘火金行乘木名曰縱火行乘水木行乘金名曰
橫水行乘金火行乘木名曰逆金行乘水木行乘火
名曰順也

問曰脉有殘賊何謂也師曰脉有弦緊浮滑沈瀦此
六脉名曰殘賊能爲諸脉作病也

問曰脉有災怪何謂也師曰假令人病脉得太陽與
形證相應因爲作湯比還送湯如食頃病人乃大吐
若下利腹中痛師曰我前來不見此證今乃變異是

名災恠又問曰何緣作此吐利答曰或有舊時服藥
今乃發作故爲災恠耳

問曰東方肝脉其形何似師曰肝者木也名厥陰其
脉微弦濡弱而長是肝脉也肝病自得濡弱者愈也
假令得純弦脉者死何以知之以其脉如弦直此是
肝藏傷故知死也

南方心脉其形何似師曰心者火也名少陰其脉洪
大而長是心脉也心病自得洪大者愈也假令脉來
微去大故名反病在裏也脉來頭小本大故名覆病
在表也上微頭小者則汗出下微本大者則爲闕格
不通不得尿頭無汗者可治有汗者死

西方肺脉其形何似師曰肺者金也名太陰其脉毛
浮也肺病自得此脉若得緩遲者皆愈若得數者則
劇何以知之數者南方火火尅西方金法當壅腫爲
難治也

問曰二月得毛浮脉何以處言至秋當死師曰二月
之時脉當濡弱反得毛浮者故知至秋死二月肝用
事肝屬木脉應濡弱反得毛浮脉者是肺脉也肺屬
金金來尅木故知至秋死他皆倣此

師曰脉肥人責浮瘦人責沈肥人當沈今反浮瘦人

當浮今反沈故責之

師曰寸脉下不至關爲陽絕尺脉上不至關爲陰絕此皆不治決死也若計其餘命生死之期期以月節尅之也

師曰脉病人不病名曰行尸以無王氣卒眩仆不識人者短命則死人病脉不病名曰內虛以無穀神雖困無苦

問曰翕奄沈名曰滑何謂也師曰沈爲純陰翕而正陽陰陽和合故令脉滑關尺自平陽明脉微沈食飲自可少陰脉微滑滑者緊之浮名也此爲陰實其人必腹內汗出陰下濕也

問曰曾爲人所難緊脉從何而來師曰假令亡汗若吐以肺裏寒故令脉緊也假令欬者坐飲冷水故令脉緊也假令下利以胃中虛冷故令脉緊也

寸口衛氣盛名曰高榮氣盛名曰章高章相搏名曰綱衛氣弱名曰牒榮氣弱名曰卑牒卑相搏名曰損衛氣和名曰緩榮氣和名曰遲緩遲相搏名曰沈寸口脉緩而遲緩則陽氣長其色鮮其顏光其聲商毛髮長遲則陰氣盛骨髓生血滿肌肉緊薄鮮靨陰陽相抱榮衛俱行剛柔相得名曰強也

跌陽脉滑而緊滑者胃氣實緊者脾氣強持實擊強痛還自傷以手把心坐作瘡也

寸口脉浮而大浮爲虛大爲實在尺爲關在寸爲格關則不得小便格則吐逆

跌陽脉伏而漐伏則吐逆水穀不化漐則食不得入名曰關格

脉浮而大浮爲風虛大爲氣強風氣相搏必成隱癰身體爲痒痒者名泄風久久爲痂癩

寸口脉弱而遲弱者衛氣微遲者榮中寒榮爲血血寒則發熱衛爲氣氣微者心内飢飢而虛滿不能食也

跌陽脉大而緊者當卽下利爲難治

寸口脉弱而緩弱者陽氣不足緩者胃氣有餘噫而吞酸食卒不下氣填於膈上也

跌陽脉緊而浮浮爲氣緊爲寒浮爲腹滿緊爲絞痛浮緊相搏腸鳴而轉轉卽氣動膈氣乃下少陰脉不出其陰腫大而虛也

寸口脉微而漐微者衛氣不行漐者榮氣不足榮衛不能相將三焦無所仰身體痺不仁榮氣不足則煩疼口難言衛氣虛者則惡寒數欠三焦不歸其部上

焦不歸者噫而酢吞中焦不歸者不能消穀引食下焦不歸者則遺洩

跌陽脉沈而數沈爲實數消穀緊者病難治

寸口脉微而濇微者衛氣衰濇者榮氣不足衛氣衰面色黃榮氣不足面色青榮爲根衛爲葉榮衛俱微則根葉枯槁而寒慄欬逆唾腥吐涎沫也

跌陽脉浮而芤浮者衛氣虛芤者榮氣傷其身體瘦肌肉甲錯浮芤相搏宗氣衰微四屬斷絕

寸口脉微而緩微者衛氣踈踈則其膚空緩者胃氣實實則穀消而水化也穀入於胃脉道乃行水入於經而血乃成榮盛則其膚必踈三焦絕經名曰血崩跌陽脉微而緊緊則爲寒微則爲虛微緊相搏則爲短氣

少陰脉弱而濇弱者微煩濇者厥逆

跌陽脉不出脾不上下身冷膚鞭

少陰脉不至腎氣微少精血奔氣促迫上入胸膈宗氣反聚血結心下陽氣退下熱歸陰肢與陰相動令身不仁此爲尸厥當刺期門巨闕

寸口脉微尺脉緊其人虛損多汗知陰常在絕不見陽也

寸口諸微亡陽諸濡亡血諸弱發熱諸緊爲寒諸乘
寒者則爲厥鬱胃不仁以胃無穀氣脾瀦不通口急
不能言戰而慄也

問曰濡弱何以反適十一頭師曰五藏六府相乘故
令十一

問曰何以知乘府何以知乘藏師曰諸陽浮數爲乘
府諸陰遲瀦爲乘藏也

仲景脉法

叔和傷寒序例

陰陽大論云春氣溫和夏氣暑熱秋氣清涼冬氣
冷冽此則四時正氣之序也冬時嚴寒萬類深藏
君子固密則不傷於寒觸冒之者乃名傷寒耳其
傷於四時之氣皆能爲病以傷寒爲毒者以其最
成殺厲之氣也中而卽病者名曰傷寒不卽病者
寒毒藏於肌膚至春變爲溫病至夏變爲暑病暑
病者熱極重於溫也是以辛苦之人春夏多溫熱
病者皆由冬時觸寒所致非時行之氣也凡時行
者春時應暖而反大寒夏時應熱而反大涼秋時

應涼而反大熱冬時應寒而反大溫此非其時而有其氣是以一歲之中長幼之病多相似者此則時行之氣也夫欲候知四時正氣爲病及時行疫氣之法皆當按斗曆占之九月霜降節後宜漸寒向冬大寒至正月雨水節後宜解也所以謂之雨水者以冰雪解而爲雨水故也至驚蟄二月節後氣漸和暖向夏大熱至秋便涼從霜降以後至春分以前凡有觸冒霜露體中寒卽病者謂之傷寒也其冬有非節之暖者名爲冬溫冬溫者毒與傷寒大異冬溫復有先後更相重沓亦有輕重爲治

不同證如後章從立春節後其中無暴大寒又不冰雪而有人壯熱爲病者此屬春時陽氣發於冬時伏寒變爲溫病從春分以後至秋分節前天有暴寒者皆爲時行寒疫也三月四月或有暴寒其時陽氣尚弱爲寒所折病熱猶輕五月六月陽氣已盛爲寒所折病熱則重七月八月陽氣已衰爲寒所折病熱亦微其病與溫及暑病相似但治有殊耳

十五日得一氣於四時之中一時有六氣四六名爲二十四氣也然氣候亦有應至而不至或有未

應至而至者或有至而太過者皆成病氣也但天地動靜陰陽鼓擊者各正一氣耳是以彼春之暖爲夏之暑彼秋之忿爲冬之怒是故冬至之後一陽爻升一陰爻降也夏至之後一陽氣下一陰氣上也斯則冬夏二至陰陽合也春秋二分陰陽離也陰陽交易人變病焉此君子春夏養陽秋冬養陰順天地之剛柔也小人觸冒必嬰暴疹須知毒烈之氣留在何經而發何病詳而取之是以春傷於風夏必發泄夏傷於暑秋必病瘧秋傷於濕冬必咳嗽冬傷於寒春必病溫此必然之道可不審

明之

傷寒之病逐日淺深以施方治今世人傷寒或始不早治或治不對病或日數久淹困乃告醫醫人又不依次第而治之則不中病皆宜臨時消息制方無不效也今搜採仲景舊論錄其證候診脈聲色對病真方有神驗者擬防世急也

又土地溫涼高下不同物性剛柔食居亦異是故黃帝與四方之間岐伯舉四治之能以訓後賢開其未悟者臨病之工宜須兩審也

凡傷於寒則爲病熱熱雖甚不死若兩感於寒而

病者必死尺寸俱浮者太陽受病也當一二日發
以其脉上連風府故頭項痛腰脊強尺寸俱長者
陽明受病也當二三日發以其脉挾鼻絡於目故
身熱目疼鼻乾不得臥尺寸俱弦者少陽受病也
當三四日發以其脉循脇絡於耳故胸脇痛而耳
聾此三經皆受病未入於府者可汗而已尺寸俱
沈細者太陰受病也當四五日發以其脉布胃中
絡於嗑故腹滿而嗑乾尺寸俱沈者少陰受病也
當五六日發以其脉貫腎絡於肺繫舌本故口燥
舌乾而渴尺寸俱微緩者厥陰受病也當六七日
發以其脉循陰器絡於肝故煩滿而囊縮此三經
皆受病已入於府可下而已若兩感於寒者一日
太陽受之卽與少陰俱病則頭痛口乾煩滿而渴
二日陽明受之卽與太陰俱病則腹滿身熱不欲
食讖語三日少陽受之卽與厥陰俱病則耳聾囊
縮而厥水漿不入不知人者六日死若三陰三陽
五藏六府皆受病則榮衛不行藏府不通則死矣
其不兩感於寒更不傳經不加異氣者至七日太
陽病衰頭痛少愈也八日陽明病衰身熱少歇也
九日少陽病衰耳聾微聞也十日太陰病衰腹減

如故則思飲食十一日少陰病衰渴止舌乾已而
噫也十二日厥陰病衰囊縱少腹微下大氣皆去
病人精神爽慧也若過十三日以上不聞寸尺陷
者大危若更感異氣變爲他病者當依後壞病證
而治之若脉陰陽俱盛重感於寒者變成溫瘧陽
脉浮滑陰脉濡弱者更遇於風變爲風溫陽脉洪
數陰脉實大者更遇溫熱變爲溫毒溫毒爲病最
重也陽脉濡弱陰脉弦緊者更遇溫氣變爲溫疫
以此冬傷於寒發爲溫病脉之變證方治如法
凡人有疾不時卽治隱忍與差以成痼疾小兒女
子益以滋甚時氣不和便當早言尋其邪由及在
腠理以時治之罕有不愈者患人忍之數日乃說
邪氣入藏則難可制此爲家有患備慮之要凡作
湯藥不可避晨夜覺病須臾卽宜便治不等早晚
則易愈矣如或差遲病卽傳變雖欲除治必難爲
力服藥不如方法縱意違師不須治之
凡傷寒之病多從風寒得之始表中風寒入裏則
不消矣未有溫覆而當不消散者不在證治擬欲
攻之猶當先解表乃可下之若表已解而內不消
非大滿猶生寒熱則病不除若表已解而內不消

大滿大實堅有燥屎自可除下之雖四五日不能
爲禍也若不宜下而便攻之內虛熱入協熱遂利
煩躁諸變不可勝數輕者困篤重者必死矣

夫陽盛陰虛汗之則死下之則愈陽虛陰盛汗之
則愈下之則死夫如是則神丹安可以誤發甘遂
何可以妄攻虛盛之治相背千里吉凶之機應若
影響豈容易哉况桂枝下咽陽盛卽斃承氣入胃
陰盛以亡死生之要在乎須臾視身之盡不暇計
日此陰陽虛實之交錯其候至微發汗吐下之相
反其禍至速而醫術淺狹懵然不知病源爲治乃
誤使病者殞沒自謂其分至令冤魂塞於冥路死
屍盈於曠野仁者鑒此豈不痛歟

凡兩感病俱作治有先後發表攻裏本自不同而
執迷妄意者乃云神丹甘遂合而飲之且解其表
又除其裏言巧似是其理實違夫智者之舉錯也
常審以慎愚者之動作也必果而速安危之變豈
可詭哉世上之士但務彼翕習之榮而莫見此傾
危之敗惟明者居然能護其本近取諸身夫何遠
之有焉

凡發汗溫服湯藥其方雖言日三服若病劇不解

當促其間可半日中盡三服若與病相阻卽便有
所覺病重者一日一夜當晬時觀之如服一劑病
證猶在故當復作本湯服之至有不肯汗出服三
劑乃解若汗不出者死病也

凡得時氣病至五六日而渴欲飲水飲不能多不
當與也何者以腹中熱尚少不能消之便更與人
作病也至七八日大渴欲飲水者猶當依證而與
之與之常令不足勿極意也言能飲一斗與五升
若飲而腹滿小便不利若喘若噦不可與之也忽
然大汗出是爲自愈也

凡得病反能飲水此爲欲愈之病其不曉病者但
聞病飲水自愈小渴者乃強與飲之因成其禍不
可復數也

凡得病厥脉動數服湯藥更遲脉浮大减小初躁
後靜此皆愈證也

凡治溫病可刺五十九穴又身之穴三百六十有
五其三十^穴灸之有害七十九穴刺之爲災并中
髓也

脉四損三日死平人四息病人脉一至名曰四損
脉五損一日死平人五息病人脉一至名曰五損

脉六損一時死平人六息病人脉一至名曰六損
脉盛身寒得之傷寒脉虛身熱得之傷暑脉陰陽
俱盛大汗出不解者死脉陰陽俱虛熱不止者死
脉至乍數乍疎者死脉至如轉索其日死讖言妄
語身微熱脉浮大手足溫者生逆冷脉沉細者不
過一日死矣此以前是傷寒熱病證候也

四時八節二十四氣七十二候決病法

立春正月節斗指艮

雨水正月中指寅

驚蟄二月節指甲

春分二月中指卯

清明三月節指乙

穀雨三月中指辰

立夏四月節指巽

小滿四月中指巳

芒種五月節指丙

夏至五月中指午

小暑六月節指丁

大暑六月中指未

立秋七月節指坤

處暑七月中指申

白露八月節指庚

秋分八月中指酉

寒露九月節指辛

霜降九月中指戌

立冬十月節指乾

小雪十月中指亥

大雪十一月節指壬

冬至十一月中指子

小寒十二月節指癸

大寒十二月中指丑

